

*End of Year Message of the President of the Republic
to the Nation*

25 December 2011

Mo bannes Compatriotes

Bonsoir

Comme chaque fin d'année, mo éna le plaisir adresse ou mo message. L'année 2011 pé tire à sa fin. Dans une semaine nou pé rentre dans 2012, et c'est avec fierté qui nou tou bizin accueillir le nouvel an.

Pou commencé, mo bizin félicite banne zenfants qui fine réussie dans zotte l'examen CPE, et qui fine faire fierté banne parents. Mo conné zotte finne faire beaucoup sacrifice pou passe sa l'examen là. Alors, pou zotte l'année 2011 pas ti facile, mais mo espérer zotte gagne ene zoli cadeau Noël comme récompense de zotte zeffort. L'année prochaine, zotte pé rentre dans collège et zotte pou un peu pli soulagé.

Mo bizin félicite banne parents, aussi bien qui banne professeurs, qui finne mette tout zeffort pou qui sa banne zenfants la réussie.

Mo banne compatriotes,

Tous les temps mo finne dire, qui c'est l'éducation qui finne faire nou arrive acotte nou été azordi. Ene ile lointaine, sans aucun ressources naturel, nou seul atout c'est nou ressources humaines. Nou meilleure l'investissement c'est l'éducation nou zenfants. Pas ziste zenfants, grand dimounes même apé continuer apprane, sinon nou pou reste en arrière. Ce qui appelle life long learning, li ene nécessité absolu azordi. Tout dimoune apprane azordi, qui li lire pou gagne ene certificat, qui li lire pou apprane ene métier, ou qui li lire pou gagne l'information lors ce qui pé passé dans le monde.

Avec globalisation, le monde finne vinne ene grand village. Pou nou capave progresser, nou bizin établir banne lien économique avec le maximum de pays, qui li par voie maritime ou aérien. Là, mo bien content qui nou l'aéroport pé agrandi, pou accueillir ene pli grand nombre de touristes.

Sa banne zenfants qui finne passe sixième, ene ti moment zotte pou grandi, et zotte pou rode travail. Avec récession qui pé frappe fort ailleurs, nou bizin explore tous banne opportunités pou qui, pas ziste nou, même nou banne zenfants aussi, capave continuer amène ene la vie prospère.

Mo banne compatriotes,

Zotte pou d'accord avec moi, si mo dire zotte qui nou bizin serre ceinture, avec situation économique difficile qui pé guette nou. Déjà, côté de l'eau nou pé souffert et nou pé bizin élimine tou gaspillage. Abé pou l'économie aussi li pareille. Li pas question ziste alle rode l'argent, mais bizin conne gérer aussi. Mo finne appranne, qui aster énan 20% population qui endetté contre 14% auparavant. Sa veut dire, soit dimoune la pas pé gagne assez l'argent pou li vivre, ou bien, li pé vivre au dessus de so moyen. Moi personnellement, mo pensé, énan beaucoup qui tombe dans sa deuxième catégorie la, zotte apé vivre au dessus de zotte moyen. Sa banne dimoune la, zotte bizin revoir zotte mode de vie, sinon zotte même pou gagne difficulté dans l'avenir.

Gaspillage dans fonction publique aussi bizin arrêter. Nou banne la loi bizin vinne encore pli sévère, pou sanctionne banne gaspillage de fonds public. Dans les autres pays, létemps ene dimoune faire gouvernement perdi l'argent à cause so mauvais gestion, prend sanction contre li. Finne arrive ler pou sanctionne sa banne dimoune qui faire gouvernement perdi des millions et des millions. Si ou pas conne travail, abé ou bizin rendre compte. L'argent gouvernement, c'est ou l'argent, ou pas capave paye dimoune pou zette l'argent par la fenêtre.

Corruption aussi pé prend ene l'ampleur grandissant. Nou bizin arrête sa monstre la, avant qui arrive trop tard. Sa li ene mal qui pou détruire nou société. Ce qui pli malheureux dans ene société corrompu, c'est dimoune misère qui pli souffert. Li bon qui Gouvernement pé créer ene société pli juste, cotte banne madame pou prend pli grand part dans politique. Mais corruption bizin arrêter, et sa li dimane ene zeffort de toute la population. Alors comme Président de la République mo faire ene appel à tou dimoune pou alle dénonce tou acte de corruption.

Ene l'autre mal de nou société, c'est la drogue, qui pé prend ene l'ampleur extraordinaire. Longtemps, la vente ek consommation la drogue ti concentré dans certaine l'endroit spécifique. Azordi sa finne rentre dans banne villages. La drogue éna ene l'effet néfaste lor nou zenfants ek nou société en général. Mo pé attirer l'attention banne autorités et la population, pou qui chacun prend so responsabilité pou mette ene frein à sa fléau là.

Mo banne compatriotes,

L'année 2011 finne riche en événement. Lor plan mondiale, nou finne trouve la fin banne dictateur couma Saddam Hussein et Khadafi. Inondations dans Thaïlande et l'Australie. Cotte nou, nou pé conne ene des bannes pires sécheresse, mais heureusement qui nou finne commence gagne un peu la pluie. L'économie mondiale finne affecté sérieusement. Tôt ou tard nou bizin paré pou faire face so conséquence. Li bon si nou prend conscience avant qui trop tard. Chacun bizin déjà commence réagir en bon patriote pou empêche nou pays affecté. La finne ler, pou tou dimoune réalise porté qui ene crise économique capave prend.

Tourisme, li ene pilier très important de nou l'économie. En terme réelle, le nombre d'arriver pé augmenter. Nou bizin conne exploite le marché en proposant banne nouveau produits. L'environnement propre c'est ene atout qui tout dimoune apprécier, alors nou bizin conne sauvegarde et protège nou l'environnement.

En parlant de touriste mo bizin mentionne aussi sécurité. Avec dégradation l'environnement sociale, sécurité touriste finne vinne ene enjeu. Chaque Mauricien bizin prend conscience qui si pénan sécurité, pénan touriste. Alors qui li l'autorité, ou qui li ene individu, chacun bizin faire de sorte qui touristes senti zotte en sécurité dans nou pays.

Mo banne compatriotes,

L'année prochaine, ene grand défi qui pé guette le monde, c'est réchauffement climatique. Banne pays industrialisé, finne finalement réaliser qui bizin prend action concret pou arrête émission gaz a l'effet de serre.

Nou aussi bizin concentrer nou zeffort lors l'énergie renouvelable, pou nou diminuer nou dépendance lor pétrole. Nou finne trouvé dans le passé, l'augmentation prix pétrole finne enan ene l'effet néfaste lor nou l'économie. Même si l'investissement dans l'énergie renouvelable li coute cher, mo content qui petit à petit plusieurs famille pé tourne vers sa, avec l'installation panneaux solaire et chauffe-eau solaires.

Mo banne compatriotes,

Li bon qui mo attire ou l'attention lor nou population vieillissante. Li ene phénomène un peu généralisé dans plusieurs pays du monde. Sa l'année la nou finne célébrer nou 43eme anniversaire l'indépendance, et sa faire 177 ans qui la pli part nou banne grand parents ti vinne Maurice. Par sa mo le dire, qui nou ene pays jeune mais déjà nou finne éna ene changement drastique dans nou société. Nou façon vivre en famille finne

changé en peu de temps. Mo pas dire qui nou pas bizin suivre le monde, mais pas tou qui arriver qui bon. Nou bizin conne faire ene choix. Surtout mo adresse moi à banne grand dimounes, qui bizin conne transmette banne valeurs morale à banne jeunes. Si azordi ou trouve autant délinquance, c'est a cause ene manque de dialogue entre parents ek zenfants, ek ene manque de surveillance aussi. Quand ou trouve banne zenfants pé enceinte à l'âge de 13 et 14 ans, abé sa faire ou réfléchi deux fois, qui l'éducation nou pé donne zotte. Qui l'avenir nou pé donne sa banne zenfants là.

Mo banne compatriotes,

Finne ler pou amène ene politique de discipline et rigueur dans nou la vie. Li important qui parfois nou assizé nou discuter. La fin l'année tou dimoune pou joine en famille et pou amuser. Moi, mo ti pou dire zotte, profite sa l'occasion là pou discute un peu l'avenir nou zenfants et nou famille. En ce faisant, nou pou continuer consolide l'unité nationale ek l'harmonie sociale.

Finalement, mo souhaite zotte tous, à Maurice comme à Rodrigues, Agaléga et St. Brandon, Joyeux Noel et mo meilleurs vœux de bonheur, de prospérité et de bonne santé pour l'année 2012.

Merci pou ou l'attention et bonsoir.